



Moutier antruras ed oz

Da l'abbazia al Giura bernais

DA GUIU SOBIELA-CAANITZ

■ **«Enconuschentamain vules la citad da Moutier, (...) en il Giura bernais, ir tar il chantun Giura. Probabel vegn Moutier a pudair votar davart ina midada da chantun en dus onns» (La Quotidiana dals 23 da zercladur 2015, p. 15). Moutier, cun 7639 olmas il 2010, vegn «resguardà sco cità dapi 1950» (1); ses legislativ communal ha num «Conseil de Ville». Enfin a 2009 era Moutier il lieu principal d'in district che purtava ses num; lur ha il chantun Berna abolì tut ses districts. Moutier è oz mo pli ina da las quaranta vischnancas da l'«arrondissement administratif du Jura bernois» (51 548 olmas), l'emprima areguard la populaziun; il lieu principal è Courtelary (1238 olmas), renumà pervi da sia fabrica da tschigulatta. Già avant quaranta onns, il 1974 ed il 1975, ha la populaziun da l'actual Giura bernais astgà tsherner per u cunter ina midada da chantun. La maiorità ha giavischà da restar bernaisa. En la citad da Moutier è lezza maiorità stada stretga: Mo settanta vuschs il 1974. Il 2017 duai la populaziun da Moutier tsherner puspè tranter Berna ed il chantun Giura limitrof, naschi il 1978 sco consequenza da las votaziuns da 1974 e 1975 e dal «gea» dal suveran svizzer al chantun nov. Tge è sa midà dapi lura?**

– Da Bumaun 1994 ha la vallada da Laufen/BE astgà ir tar il chantun Basilea-Champagna sco consequenza da votaziuns relativas.

– Il 1996 ha la vischnanca da Vellerat/BE astgà ir tar il chantun Giura sco consequenza da votaziuns complementaras.

– Il chantun Giura (71 713 olmas) exista dapi trentaset onns, na vegn betg mess en dumonda e promova il studi dal tudestg, la lingua da Basilea (165 566 olmas), center cultural ed economic da la regiun.

– L'atmosfera è sa schlucada tranter la maiorità catolica dal nov chantun e la maiorità reformada dal Giura bernais.

Ils prinzi-vestgs da Basilea

Ins po pia far endament en pasch ils tschientaners cuminaivels aifer la «prévôté» (prepositura) da Moutier e lur il principadi da l'uestg da Basilea. «Enfin a la revoluziun franzosa era l'istorgia dal Giura sco il resultat da trais forzas: Quella dal Giura, quella da las claustras e quella dals uestgs. Il Giura è il num collectiv da cuminanzas pitschnas spargliadas en valladas separadas e planiras autas (...). La segunda forza è quella da las claustras (...). La principala (...) era quella da Moutier-Grandval, l'emprima che ha rimnà l'intschess dal Giura. La terza forza è quella dals uestgs; senza questa forza na dessi nagin Giura, gnanc il Giura bernais reformà (...). Igl è reusi als uestgs da Basilea d'elavurar in rom politic or da quel Giura manizza. Igl ha entschavi en la Burgogna da la dinastia dals Rudolfs» (2). Il nom da Moutier, sco quels da Mustér e Müstair, deriva dal latin «monasterium» («claustra»). Manejada è la claustra da Moutier-Grandval, fundada enturn l'onn 640 dal duca d'Alsazia. L'abbazia ha fatg tras ina remartgla fluriziun culturala; da quai dat perditga la bibla carolinga da Moutier-Grandval, oz conservada en la British Library da Londra (...). Il 999 ha retg Ru-

dolf III da Burgogna regalà l'abbazia a l'uestg da Basilea; lezza donaziun ha stgaffi il coc dal futur principadi episcopal. Pli tard han ins transformà l'abbazia en in chapitel da canonis; l'emprim prevost documentà (1120) ha fundà enturn 1140 la claustra premonstratensa da Bellelay (...). Il chapitel da Moutier-Grandval è fugì il 1534 a Delémont nua ch'el è sa stabili definitivamain il 1571; (...) lur ha'l cedi ses dretgs en la vallada da Moutier a l'uestg» (3). Il 1529 ha la reformaziun triumfà a Basilea; l'uestg ha stuì ir a star a Porrentruy, oz en il chantun Giura, ma ha mantegnì il titel episcopal basileis. L'anteriura claustra da Bellelay, abolida il 1797, è situada en la vischnanca da Saicourt/BE. Ins po concluder: «Sut ils prinzi-vestgs han ils Giurassians mintgatant fatg tras uras fustgas. Ma il Giura existeva, el furmava in stadi, el possedeva l'indipendenza politica. Cur ch'il principadi è svani han ils Giurassians pers l'indipendenza. Lezza n'hani anc betg reacquistada» (4). Quai scriveva 1968 in istoricher friburgais, cur ch'in moviment politic giurassian cumbatteva per in chantun Giura en il ravugl da la confederaziun. Oz exista in tal chantun, «république et canton du Jura», e la citad pitschna da Moutier, antruras amez il principadi dals uestgs, less s'integrar a lezza cuminanza.

1. François Visard en: Marco Jorio (ed.), «Dizionario storico della Svizzera». Tom 8. Lucarn (Armando Dadò, ISBN 978-88-8281-100-6) 2009, p. 680, chavazzin «Moutier (comune)».

2. Gonzague de Reynold (1890–1980), Destin du Jura. Losanna (Rencontre) 1968, pp. 151–153.

3. Kathrin Utz Tremp en: Marco Jorio (sco nota 1), pp. 680–681, chavazzin «Moutier-Grandval».

4. Gonzague de Reynold (sco nota 2), p. 252.